

Ո Ր Ո Շ ՈՒ Մ թիվ 53
Վարչական տույժ նշանակելու մասին

«10» մարտի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Հադի Ազիզի Բաշիրփուրի վերաբերյալ նյութերը.

Պ Ա Ր Զ Ե Ց Ի՝

2020 թվականի դեկտեմբերի 20-ին ՀՀ ՊԵԿ Հարավային մաքսատուն-վարչության աշխատակիցները Մեղրիի մաքսային կետ-բաժնի տարածքում զննության են ենթարկել ՀՀ-ից ԻԻՀ մեկնող, ԻԻՀ քաղաքացի Հադի Ազիզի Բաշիրփուրի կողմից շահագործվող «IVEKO» մակնիշի, 51A67/12-10 հաշվառման համարանիշի բեռնատար ավտոմեքենան, ինչի արդյունքում, նշված բեռնատարի կցորդիչի կողային բեռնախցիկից, մեքենայի պատկանելիքների և ձմեռային անվաշղթաների տակից հայտնաբերել են մաքսային հսկողությունից թաքցրած՝ տեսախցիկի հաղորդակար 20,5 կգ քաշով և կոունկի հիդրավլիկ սարքավորում 43,5 կգ քաշով:

Փաստի առթիվ Հադի Ազիզի Բաշիրփուրի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ վերցված 20,5 կգ քաշով տեսախցիկի հաղորդակարը և 43,5 կգ քաշով կոունկի հիդրավլիկ սարքավորումը, որպես իրավախախտման անմիջական օբյեկտ, վերցվել և ի պահ են հանձնվել Մեղրիի մաքսային պահեստում:

11.01.2021թ. նշանակվել է «Ապրանքագիտական փորձաքննություն», որի կատարումը հանձնարարվել է ՀՀ «Փորձագիտական կենտրոն» պետական ոչ առևտրային կազմակերպությանը:

19.02.2021թ-ի որոշմամբ Հադի Ազիզի Բաշիրփուրի վերաբերյալ վարչական վարույթի ժամկետը երկարաձգվել է՝ մինչև փորձագիտական եզրակացություն ստանալը:

ՀՀ «Փորձագիտական կենտրոն» պետական ոչ առևտրային կազմակերպության փորձագետի 02.03.2021թ. թիվ 00172110 եզրակացության համաձայն՝ փորձաքննությանը ներկայացված ընդհանուր 20,5 կգ քաշով տեսախցիկի հաղորդակարի և 43,5 կգ քաշով կոունկի հիդրավլիկ սարքավորման շուկայական արժեքը 2020 թվականի դեկտեմբերի 20-ի դրությամբ ընդհանուր կարող էր կազմել 517,500 ՀՀ դրամ:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր

օգտագործելու միջոցով եւ (կամ) նույնականացման կեղծ կամ այլ ապրանքներին վերաբերող միջոցներ օգտագործելու միջոցով:

Մաքսային կարգավորման մասին օրենքի 73-րդ հոդվածի 2-րդ մասի համաձայն՝ Հայաստանի Հանրապետության սահմանով արտահանվող ապրանքի մաքսային արժեքը գործարքի գինն է, այսինքն՝ այն գումարը, որը փաստացի վճարվել է, ենթակա է վճարման կամ պետք է վճարվեր ապրանքը արտահանելու նպատակով ձեռք բերելու և մինչև Հայաստանի Հանրապետության սահմանը տեղափոխելու համար:

ՀՀ Մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ, չներկայանալու դեպքում կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Հադի Ազիզի Բաշիրփուրին 2021 թվականի մարտի 10-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 201-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, նյութերով պարզվել է, որ 2020 թվականի դեկտեմբերի 20-ին, Հադի Ազիզի Բաշիրփուրին մաքսային հսկողությունից թաքցնելով՝ մասնավորապես հայտնաբերումը դժվարացնող եղանակով, բեռնատարի կցորդիչի կողային բեռնախցիկից, մեքենայի

պատկանելիքների և ձմեռային անվաշղթաների տակից թաքցրած ՀՀ մաքսային սահմանով տեղափոխել է 517,500 ՀՀ դրամ արժեքով 20,5 կգ քաշով տեսախցիկի հաղորդալար և 43,5 կգ հիդրոգլան, այսինքն՝ Հադի Ազիզի Բաշիրփուրին թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, 20.12.2020թ-ի մաքսային գննման (տեսագննման) ակտով, ՀՀ «Փորձագիտական կենտրոն» պետական ոչ առևտրային կազմակերպության փորձագետի 02.03.2021թ. թիվ 00172110 եզրակացությամբ:

Վերոգրյալի հիման վրա և ղեկավարվելով ՀՀ Մաքսային օրենսգրքի 201-րդ հոդվածով, 206 և 221, 224 հոդվածներով,


Ո Ր Ո Շ Ե Ց Ի

1. Հադի Ազիզի Բաշիրփուրին (ծնված՝ 22.06.1982թ., ԻԻՀ, Թավրիզի շրջան, ք. Միսնե, Անդիշե պող., փողոց Սինատ, տուն 12, անձնագրի համարը K41805421) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել ՀՀ մաքսային սահմանով թաքցնելով տեղափոխված 20,5 կգ քաշով տեսախցիկի հաղորդալարի և 43,5 կգ հիդրոգլանի մաքսային արժեքի չափով՝ 517,500 ՀՀ դրամ: /վճարումը՝ 900005024055 հաշվեհամարին կող 19/:

2. Վերցված ապրանքները կարող են վերադարձվել տուգանքի վճարումից հետո՝ մեկ աշխատանքային օրվա ընթացքում:

3. Որոշման մասին հայտնել Հ.Բաշիրփուրին՝ պարզաբանելով, որ ՀՀ Մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ Մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ Վարչական դատարան երկու ամսվա ընթացքում

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ